

Rita Juon preschainta igl sieus ampren cudesch

«La mort segl Pez Bavregn» e igl ampren roman criminal ca l'autura da Masagn â scret

■ (anr/bt) La librareia Kunfermann da Tusàn e stada fulanada an vendergis sera cur ca Rita Juon â preschainta a preliegu igl sieus ampren roman. L'istorgia criminala gioja par gronda part se Glas, ad igl aczidaint sen la senda anviers igl Pez Bavregn e suspectus. «Rita Juon e l'amprema autura da nossa valada c'â scret egn roman criminal», salida Lorenz Kunfermann igls passa 80 auditors ca spetgan cun tensiun vasevra la lectura a las explicaziuns da l'autura oriunda da Tusàn, ca stat a Masagn. Igl e betga me igl ampren cudesch da Juon, mobagn leza sera â er gieu liac la sia amprena prelecziun publica. «Igl e sto difereints auturs c'ân fatg lur amprena prelecziun qua tier nus agl dacurs digls davos 25 ons, ad egn pèr dad els en alura propi davantos renumos», aschunta Kunfermann. Forsa e quegl egn bün omen par l'autura Juon. La partenza e an mintga cass gartageada or furma. Kunfermann â raschün, sch'el gi c'igl sactrati

betga me d'egn roman criminal, mobagn d'egna impressiunanta descripsiun da la glieud da la Mantogna, partge la gronda part da l'istorgia capeta agl uclàn da Glas a surtut an l'ustreia Bavregn. «Igl e egn roman criminal c'e invento da l'antscheata antoca la fegn», gi l'autura. «Las parsünas a l'acziun en absolutameing fictivas», sinzerescha Juon c'â scret egn'istorgia criminala classica, an la quala igl dat egn dubiusa disgratzga mortala. Igl partutgieu e egn turist c'era curdo an il agl uclàn da Glas cun sieus sacuntaner malamparnevel. An consequenza da quella disgratzga dat igl egn retscha da parsünas suspectadas sco igl ustier holandes, alura igls turists austriacs c'ân satgacoss ampo greavs, a surtut e'gl que curius apostel Pulit ca viva dad ons annâ sulet se Glas. Mo igls cunsorts Hunger, c'observan tut tge ca cura a passa agl uclàn – sco igl s'oda par egn vischnànca muntagnarda – s'angaschan par el. Agl curs digl roman, c'â tres parts, prend'ign d'ancanu-



L'autura Rita Juon a caschün da la preschantaziun digl sieus ampren roman: «Jou sund me an marveglias tge ca las mias figuras fan a davaintan.»

FOTO B. TSCHARNER

scher ple bagn tut las parsünas ca giojan ena rola a l'istorgia. A quegl e egn vera farmetzga da Juon da caracterisar las par-

sünas aschi fegn a manedlameing c'ign survean l'impressiun c'ign igls ancunuschi da gitg annâ. Igl roman viva da nun-

dumbrevlas ideias a mussa la viva fantaschia da l'autura ca divertescha ligidras a ligiders cun infurmaziuns sur da numas a cuntrada c'ign e adigna an marveglias: Tge sa'la ear anc d'egn liac near d'egna parsüna? An la savunda part antscheva la polizeia ad investigar, ad ign vean confrunto cun l'istorgia digl um solitari c'â gieu da cumbater cun blearas fridas digl dastegn. La tarza part gioja egn pèr eanddas ple tard cur c'igls sgarbugls vignan plànet schlieus. Ad a la fegn rest'igl nigas amparadas nunraspundidas, aschia ca lecturas a lecturs vignan or da tutas marveglias.

Gest aschi interessant sco da tarlar passaschas digl roman e'gl sto da tarlar tier a Juon co igl roman segi naschieu. Quegl â ella fatg da maniera aschi divertevela c'igl â do tant da rir c'ign â tut ambliido c'igl cuntegn digl cudesch tracti d'egn mazamaint. Igl cudesch «Tod am Piz Beverin» e egn vera truvaglia an la mar da la literatura criminala.



Grepa sbuanta segl tschancün da Starlera sen la veia viglia d'Avras.

FOTOS O. HUGENTOBLE

Novas da la veia viglia d'Avras

DAD OSKAR HUGENTOBLE

■ Igl parsura da l'Uniun veia viglia d'Avras, Bruno Loi, â manzuno an sieus raport anual a caschün da la radunanza digls 16 da marz a Cröt digls success a regress digl on passo. Igl legrevel e c'igl e gartagieu da biagear la senda trânter Farera a Plàn Davains. Igl regress en igls dons c'igl â do segls tocs gea sanos. L'uniun â ear gieu da prender cumgieu digl gidànter da blears ons Gusti Stoffel.

La bursera Sandra Höllrigl â fatg a saver c'igl segi gartagieu da pajear tut igls quents, malgro la tandida situaziun finanziaria da l'uniun. Ca las custusas lavurs ân pudieu vagnir fatgas e me sto pussevel graztga agls sustegns digls vaschinadis d'Avras, Farera, Andeer, digl cantün, da la cunfederaziun, digl Fund par la cuntrada svizra, da la Fundaziun svizra pigl schurmetg da la cuntrada a da blears donaturs.

Hansjürg Jenny â raportu da las lavurs cumegnas digl atun passo. Displaschevlameing e'gl uon betga pussevel da sanar novs tschancüns parquegl c'igl e da coordinar las lavurs cuagl ufezi da construcziun bassa a l'Astra, quegl c'antarda ellas. Parsuainter tutg'igl da far custusas lavurs

da reparatura ve da miraglia sbuada. Igl custs par talas vignan a surpassar igl miez miliun. Mo igl Fund par la cuntrada svizra contribuescha 150 000 frâncs.

Rudolf Veraguth da Campsut surprena las lavurs da controlar la veia a

survigilar igl mantignamaint. La gronda feasta da l'avertura da l'antiera veia viglia trânter Andeer a Juf po peia betg aver liac uon, mo igl vean puspe a dar turs acumpagnieus segls tschancüns passabels.



Lavor cumegna da tut'ora an la Gianda Manedla an favur da la veia viglia d'Avras.

Ziràn venda l'antieriura tgea comunala par redutgear seas dabets

Radunanza comunala da Ziràn-Reschen

■ (anr/bt) Igl tarvaschegns da Ziràn-Reschen digls 23 da marz â prieu par bien la revisiun parziala da la planisaziun locala, â fixo zonas da schurmetg da las funtânas, dezidieu la vendita da la tgea comunala a cunzedieu credits agl rom da 100 000 frâncs. Sco amprena fatschenda â l'igl tarvaschegns prieu par bien la revisiun parziala da la planisaziun locala davart igl plan da zonas ad igl plan general da la deponia dad Avas. Digls 1956 annâ existia igl deposit da material ad Avas c'era alura vagnieu realiso da las Ovras electricas Ragn posteriur. Cun la revisiun parziala da la planisaziun locala e'gl ussa vagnieu instrado las premissas par la davosa fasa da la deposiziun da material ad Avas.

Ear an la savunda fatschenda ân igls vaschegns gieu da s'ocupar cun la planisaziun. Savund igl urden partutgant igl schurmetg da l'aua en cantün a vaschinadis ublicus da fixar igl perimenter da las auas curaintas. Quegl â da capitar agl

rom da la planisaziun locala. Igl tarvaschegns â apruvo ear quella revisiun parziala ca fixescha igl antschieus da funtânas ad igl sieus schurmetg. Partutgant igls dus uals da Sameast â l'igl tarvaschegns dezidieu da strushear quels digl plan d'avertura savund la proposta or digl miez da la radunanza.

Plenavânt e'gl vagnieu dezidieu da vender las tschentg abitaziuns an l'antieriura tgea comunala c'ân la valeta da var 1,6 miliuns frâncs. Que pass e basignevel par l'egna par savundar a las parscripsiuns digl model da contabilitad harmoniso II, a par l'otra servan antradas par redutgear igls dabets digl vaschinadi da var ortg miliuns a cuntribuir a las investiziuns dad 1,5 miliuns par la sanaziun digl prevedimaint d'aua.

Igl credit da 50 000 frâncs par schlargear l'antrada a la baselgia da San Martegn e ear vagnieu prieu par bien, maddameing l'expensa da 50 000 frâncs par biagear parcadis sper la tgea comunala.

Kaspar Kunz-Meyer pardicant nov

■ (anr/bt) La radunanza ordinaria da la plev Ziràn-Munogna da Schons â ligieu an measeanda passada ser Kaspar Kunz-Meyer sco successur da la plavanesa Suzanna Hustkamp. Suainter la demissiun da la plavanesa Suzanna Hustkamp, c'era büns tres ons an parvenda, â la plev da Ziràn-Munogna da Schons gieu d'ancurir egn successura near egn successur. Lur tscheartga e stada da success. An measeanda passada ân las cumembras a cumembers da la plev ligieu unanimameing ser Kaspar Kunz-Meyer da Cuir sco nov pardicant. Ser Kunz e oriundameing da Steffisburg, Berna. Actualmeing e' l'an parvenda a Cuir ad an Tumulstga Dafora, suainter aver pasturo durant 10 ons sen la Mantogna Dafora. El e marido cun Susanna Meyer Kunz ad â duas feglias. Ser Kunz vean ad antrar an plaza igl curs da quest atun. Sper igls survetschs divins an la plev vean el ear a dar lecziuns an las scolos. Pigl proxim miez on sara igl diember da survetschs divins redutgieus ampo, mo tant sco pussevel vignani salvos da substituents. «Sch'igl dat cass d'urgenza stuainsa ancurir schliaziuns situativas», gi Andrea Clopath, igl parsura da la plev Ziràn-Munogna da Schons. La plavanesa Hustkamp salva igl sieus davos priedi la dumeingia da Pastgas. Sco ulteriura fa-



Ser Kaspar Kunz-Meyer, igl pardicant nov da la plev da Ziràn-Munogna da Schons. MAD

tschenda ân igls cumembers da la plev gieu da prender par bien igl quest anual ca seara mains favurevlameing c'igls 2016. «Igl 2016 e sto egn on extraordinari. Igl e antro duple taglias ca budgetadas parquegl c'igls vaschinadis vevan reglo danov lur cumpart da taglias», gi Clopath. «Quegl â gieu par consequenza c'igl quest digl on passo seara mains bagn. Igl quest e tutegna angulivo, cumbagn ca las cuntribuziuns da l'egualisaziun da finanzas pigls 2017 en stadas ple pintgas. Mo la situaziun finanziaria da la plev e egualisada graztga agl surple digl on avânt.»